

21/05/2003

Tiada cadangan semak tambatan ringgit: PM

Nur Lina Rasol

DATUK Seri Dr Mahathir Mohamad berkata, kerajaan tidak bercadang menyemak

semula kadar tambatan nilai ringgit kepada dolar Amerika Syarikat (AS) ketika ini, walaupun nilai mata wang AS itu sudah merosot kira-kira 30 peratus sejak dua tahun lalu.

Perdana Menteri berkata, pendapatan negara ini dalam dolar AS masih baik, walaupun nilainya sudah berkurangan jika dibandingkan dengan mata wang Euro.

Beliau berkata, berikutan kemerosotan dalam nilai dolar AS itu, peniaga

perlu membuat pertimbangan ketika membeli barangan dari luar negara.

"Tetapi ini hanyalah sebagai penjelasan saja, bukan bertujuan nak buat apa-apa perubahan. Apa yang patut dilakukan, peniaga perlu membuat pertimbangan ketika membeli barangan dari luar negara," katanya.

Dr Mahathir yang juga Menteri Kewangan berkata demikian ketika berucap pada pembukaan sesi kedua Dialog Bajet 2004 di Putrajaya, semalam.

Sesi semalam menumpukan kepada isu sektoral dan industri.

Sejak September 1998, kerajaan menambat nilai ringgit pada RM3.80 bagi satu dolar AS. Oleh kerana ringgit ditambat kepada dolar AS, nilai mata wang tempatan itu turut susut apabila nilai mata wang AS itu merosot berbanding mata wang utama dunia yang lain.

Mengenai ekonomi negara, Dr Mahathir berkata, Malaysia tidak boleh terlalu bergantung kepada sektor awam untuk menjana pertumbuhan atau bergantung kepada produk tertentu saja.

Perkembangan globalisasi dan arus perubahan teknologi yang pantas juga memerlukan supaya Malaysia meningkatkan ketahanan ekonomi dan memperkukuhkan daya saing di peringkat antarabangsa, katanya.

Beliau berkata, walaupun pertumbuhan Keluaran Dalam Negara Kasar (KDNK)

Malaysia tahun lalu adalah baik, tetapi ia masih dijana perbelanjaan sektor awam dan peningkatan semula permintaan luar, terutamanya eksport barangan elektrik dan elektronik.

Tahun lalu Malaysia mencatatkan pertumbuhan KDNK sebanyak 4.2 peratus, jauh lebih tinggi berbanding 0.4 peratus pada 2001.

Bagaimanapun, Perdana Menteri berkata, sejak melangkah ke tahun 2003, keadaan ekonomi global tidak begitu menggalakkan.

Ini berikutan terjejasnya keyakinan pelabur kesan daripada salah laku korporat di negara maju, pencerobohan ke atas Iraq dan ancaman wabak Sindrom Pernafasan Yang Teruk (SARS), kata beliau.

"Walaupun perang Iraq sudah berakhir, namun ketidakstabilan geopolitik di Asia Barat mungkin berlarutan bagi tempoh yang panjang, dan keadaan ini

pasti meresahkan pelabur. Ini boleh menjejaskan aliran perdagangan dan pelaburan langsung asing," katanya.

Dr Mahathir menegaskan, kini sudah nampak tanda yang pertumbuhan ekonomi

dunia akan menjadi perlahan dengan wabak SARS menggugat aliran perdagangan

dunia dan kekerapan perjalanan.

"Industri pelancongan yang membabitkan perhotelan, restoran, pengangkutan dan perniagaan runcit mula mengalami kemerosotan perniagaan.

Kadar penginapan hotel menurun ke paras 40 peratus dan industri penerbangan mengalami kesukaran dengan berkurangnya bilangan penumpang dan

berlakunya pembatalan penerbangan," katanya.

Namun, daripada aspek ekonomi makro, asas ekonomi Malaysia tetap kukuh, kata beliau.

Beliau berkata, dalam tempoh suku pertama tahun ini, beberapa angka tunjuk ekonomi negara mencatatkan angka yang stabil dengan eksport meningkat 7.8 peratus, pertumbuhan import di paras positif 2.4 peratus, Indeks Pengeluaran Perindustrian meningkat 5.4 peratus dan Indeks Pengeluaran Pembuatan meningkat 6.3 peratus.

Perdana Menteri juga berkata, walaupun kerajaan mengamalkan dasar fiskal yang mengembang, namun ia sentiasa komited untuk mengawal defisit supaya tidak terus meningkat.

Beliau juga berharap pengguna dan pelabur mempunyai keyakinan untuk berbelanja bagi mewujudkan permintaan supaya pengeluaran dan pelaburan dalam negara terus berkembang.

Dr Mahathir berkata, kerajaan akan terus berusaha untuk memperbaiki lagi iklim pelaburan dan mengurangkan kos kendalian perniagaan.

"Sebenarnya semua pihak sama ada sektor awam atau swasta perlu memperbaiki lagi kecekapan sistem penghantaran masing-masing," katanya.